

敬

事

草

敬事草卷九目錄

求補閣臣及禮卿揭帖

再求補閣臣揭帖

糾劾來朝官請臨御揭帖

請允首輔歸揭帖

催考官揭帖

請補天下官揭帖

請補講官揭帖

言大禮揭帖

李成梁可遼帥及宣大督撫當補揭帖

再催遼帥及言罷斥多管揭帖

乞假揭帖

辭府江恩命疏

謝問疾賜物疏

再辭府江恩命疏

乞歸疏

三辭府江恩命疏

乞慮囚揭帖

乞歸揭帖

言楚亂揭帖

四辭府江恩命疏

大典揭帖

五辭府江恩命及乞歸疏

回諭札言楚變處置揭帖

又言楚事遣官揭帖

催點各司道官揭帖

票鄭國泰本附揭帖

言首輔病催補閣員揭帖

擬救荒諭揭帖

催補科道揭帖

言李頤當陞揭帖

救何棟如揭帖

再揭帖

催點四川巡按揭帖

救何棟如馮應京揭帖

催大審揭帖

敬事草卷九

柱國少傅兼太子太傅吏部尚書中樞殿大學士臣沈一貫

求補閣臣及禮卿揭帖

題照得新春序入典禮將行又當會試殿試之年有考試讀卷等事一一繁重皆宜備官而首輔在告既難強起臣愚一身不給任使乞將屢推閣臣特賜簡命以供承弼典試之用其禮部堂上止有右侍郎朱國祚一員亦難展轉併乞檢吏部所推尚書侍郎各點一員庶幾衆職

敬事章

卷九

有供而典禮無廢緣時日近迫職掌攸關不敢
不摘其緊要者冒顏以請惟垂念而亮允

二十九年

正月初五日

再求補閣臣揭帖

題照得今年二月當會試之期舊例命閣臣一員主考今首輔病已危薦止臣直閣無可承遣又禮部舊例該知貢舉官二員一員入場供事一員在部掌印今止有右侍郎朱國祚一員不免顧此失彼殿試事務尤係內閣專職往時閣臣四五員分理尚恐不給今臣豈能獨辦亦恐禮部之難拮据也直今冠婚冊立大典將成備禮備官需人尤急臣于本月初五日上揭恭請

久候未下輒敢不避煩瀆乞 皇上親簡閣臣
二三員以資贊襄并于吏部會推本內點禮部
尚書侍郎各一員以充任使臣素嬰多病近益
衰殘年間屢告實非得已今月初十日詣午門
前謝假俄觸風寒即發痰暈又汗又吐又下一
時並集移時方醒扶掖還家調理緣係令節不
敢奏聞至十三日因頒詔慶典強出供事今猶
目眩耳鳴不耐辛苦君恩山重聖眷天隆委身
鞠躬自臣分誼但恐力窮智竭僨輳覆餗憂不

細也既無所推避又無所控祈且係迫切緊要
之際安得不哀請于君父之前惟冀 聖慈俯
留片晌之神不惜隻字之重命官分治以亮天
工庶幾臣得藉手以報鴻恩

二十九年正月十六日上

糾劾來朝官請臨御揭帖

題該刑部等衙門一本為糾劾事因天下大小
官員來朝擬于二十三日舉大班糾劾之典臣
惟朝覲考察國家大事既以黜陟寄之部院慎
詳隲而明至公又以糾劾揚之大廷飭訓辭而
昭聖意不過一臨蒞一戒諭而激勵人心之大
機實在於此自頃以來皇上葆真清籙希傳
蹕音而法禁浸踈人心浸玩則所以易踈而密
起玩而惕者正在今日蓋此典乃三載一行非

常行之典各官又萬里遠至非常朝之官考察
既畢雖薄有所懲而糾劾未行豈翻然知改非
引之于至近臨之以至尊肅之以彈章需之以
玉音則德意無由而宣達精神不見其流通計
事雖成視同故事人心終無警吏治終難興也
比者征播獻俘御樓受賀各官快覩猶謂竒逢
若親以其職事而儼然睹天威于咫尺輟然聆
天語之責成其為濯摩更當萬倍伏願 皇上
暫移天仗一御文華殿面賜糾劾處分不惟使

來朝諸臣有所稟承而在廷在外爭自奮矜思
宣德意于天下矣

正明十
八日上

請允首輔歸揭帖

題蒙發首輔病告本令臣擬票臣一向望首輔
再起且避嫌疑不敢輕票其去比冬入春臣親
見其病勢沉重而其二孫及諸家人皆向臣洒
泣若擬再留則臣以不誠事 皇上且以不信
待僚長矣為輒擬恩放一仰體優禮輔臣之意
查例從厚臣不敢私惟 聖明裁亮

二月初四日上

催考官揭帖

二臣題會試各供事官例以初七日陞辭入簾
今已初六矣臣等推舉考官正副二員未奉
俞旨時日甚迫伏乞 皇上垂念即賜批發庶
不誤明早入簾大事伏候 敕旨

二月初六日上

請補天下官揭帖

題昨吏部尚書李戴到朝房會臣言大察之後
外任缺官甚多而最緊要者天下兩司缺七十
餘員頃者推補未俞不勝懸跂臣惟布按二司
官乃一方官之綱紀綱紀弛則條目廢簿書期
會無所稟承貪酷縱肆無所稽察錢糧無所督
催盜賊無所詰捕訟獄無所清理軍民無所安
輯地方關係誠非眇小大察畢時 明旨令各
官領勅之後嚴限刻期到任不許留京過家違

者聽撫按官嚴叅重處蓋宸衷之周于四海如此今吏部推本未下又上總催及職名脚色一本簡要明白便于覽裁伏乞留神點發臣愚不

勝惓惓

二月十三日上

請補講官揭帖

二臣題照得日講官舊例六員後止存二員一
撰大學衍義講章一撰通鑑講章今春講官劉
元震考滿未經復職則僅存朱國祚一員撰通
鑑講章而衍義講章闕人撰述因循日久曠廢
滋深在元震則堅以未奉復職之命不敢朦朧
直講此其翼翼之小心也乞命元震照舊日講
惟復別有處分庶臣等有所遵奉不誤講讀大

事

二月十四日上

言大禮揭帖

題臣自去年春夏之交入侍 皇長子講筵至
于杪秋病告不出昨者循例入侍曠違一年矣
仰見睿體益充睿學日懋聰明仁孝簡默端凝
甚肖我 皇上真吾君之子也臣不勝慶賀臣
惟冊立冠婚之典屢奉 諭旨昭如日月中外
遵守亦既有年臣每抑按諸臣令其靜俟今春
已過半而未聞囂譁一則信 聖衷之無他一
則諒時勢之難緩頃 皇上渙發天心特命移

宮又傳講學此中外所為安定也但衆口不齊
人情難保桃夭之期甚迫而迨吉之命未聞其
為激聒端恐不免伏望趣此諸臣無言之時接
續發諭令禮部擇日具儀以成慶典以彰英斷
幸甚臣惟我國家聖聖相承家法極正我皇
上至孝寧親至友睦弟至慈鞠子一動一作必
于禮制皆可為萬世準繩緝熙光明正在今日
以昭令名于海宇以軼顯號于帝王令索瑕指
類之徒不得輕弄筆舌豈不美歟臣又惟華封

老人之祝帝堯也一曰富一曰壽三曰多男子
豈不以富而且壽始見福徵多子多孫方稱全
福此盛德聖人之所克享而忠愛臣子之所共
祈也臣嘗恭考我國家史牒太祖開天立極

壽考發祥時則二十五子一百二十一孫累朝
以來本支日茂如成祖四子二十一孫仁

廟十子十四孫英廟九子三十孫憲廟十

四子二十一孫皇祖世廟篤生穆考光啟

皇上所誕八子五女十一子女孫當其時龍種

滿前捧觴上壽衍皇派于不億奠磐石于萬方
有親見曾孫而含飴嬉弄剖圭分封者父子祖
孫白首與朱顏相映宮闈熙熙稱至樂已故記
稱父母和順而本之于宜爾室家詩詠克昌厥
後而繼之以綏我眉壽然則室家之樂正以醞
釀太和而開聖心之愷懌子孫之昌正以培
養元氣而增聖壽于萬年也今皇長子既
踰冠室之期諸皇子亦當長成之日繩繩繼繼
宜子宜孫皇上方以盛齡凝命厚德歛福可

以齊休 二祖而度越 諸宗令螽斯麟趾圍

繞膝前而共舉萬年之觴此人間之至樂 聖

皇之能事豈惟家慶實乃國禎何不及時而遂

舉此禮也臣又聞之信鄙俚之談者閑理義之

論狗曲小之忌者妨遠大之福故無稽之言勿

聽弗詢之謀勿庸惟德動天眷德自古談陰陽

天人而窮理盡性以至于命者莫詳于易易曰

天之所助者順也人之所助者信也是以自天

祐之吉无不利也夫以天人之助而歸之順信

則一德修而與吉會可以斷天下之疑矣今豈
有以妨忌曲說進而致聖心不能釋然乎明
主舉事惟問典憲何如理義何如聖賢之謨訓
先王之成法何如若浮游紛淆依托疑似非經
非法之言皆絕勿進故禮樂明備道德崇厚而
祿壽亦無窮也今臣雖愚所靠者皇上所重
者君父所守者忠敬所願者吉祥日以福壽
康寧為皇上祈祝于皇天后土社稷
祖宗之前即滿朝臣子賢愚不同而此心盡同

儻有小小妨忌豈忍冒昧隱默不思一為委曲
通融成全之計者乎 皇上聰明齊天諒無此
等繫係有如不釋請思 祖宗時循用何道而

康寧福壽則知妄忌不足信而良時不可失矣
臣獨力承天無可推托故不覺率爾深言不知
忌諱揆理度事稽古考今聖賢垂世立教之論
祖宗光前裕後之蹟昭然不爽更無纖疑實非
強辭借言為開道計 皇上信臣甚專托臣甚
重而又正在少歡樂多憂虞之際故心沃心釋

虞成歡真輔弼事臣復何人而敢懷情不盡是

十其區區惟

聖明留神省察

二月二十七日

言李成梁可遼帥及宣大督撫當補揭帖

題臣惟當今急務莫有甚于邊防者遼帥馬林
既見黜矣 聖諭令兵部早補是誠至計昨接
塘報言虜歹青等于三月初一日犯錦州方春
虜馬正弱而敢于入寇其蔑視中國甚矣幸我
兵偵探備禦無所失即出境耳遼之仕官及舉
監生員吏役人等連名投揭朝房謂昔李成梁
鎮守遼東二十年屢奏捷功虜人畏服自成梁
離鎮十年之內八易大將戎務盡弛戰守無資

遼事之壞已到七八分處還將成梁前去方可
整理不然日壞一日必無遼矣彼家在鐵嶺為
國為家必宜盡力況其威名夙著命若一下虜
必知懼非他將所能及也衆人再三懇臣奏聞
昨本兵與臣商量故俯順輿情推舉前去伏望
皇上軫念遼東國家肩髀陵京藩鎮准命李成
梁出鎮仍乞稍加禮數作彼忠勤勉以大義勿
許以老為辭國事幸甚臣又惟宣大與大虜只
隔一牆虜王雖安靜而別部小達子時時作歹

未可便置度外又况虜性無常安知不乘我懈
弛俄作叅差乎今宣府巡撫王象乾已陞川貴
總督而宣大總督楊國禎又適丁憂二缺皆經
曾推未蒙點用臣以為此又一大急務也巡撫
之篆可令總督暫管而總督又缺復令何人代
庖一切撫賞諸夷統率將士分布兵馬督理糧
餉緝捕盜賊安輯軍民皆非小務又無主管則
內而廢事外而損威諸虜聞之不益輕中國乎
此二員官比之天下各衙門官萬分緊急伏乞

早賜簡用點發幸甚幸甚臣考嘉靖間 皇祖
甚重邊計然尚有庚戌之事虜騎直薄京城烽
火照徹禁內 皇祖至廢寢食逮 皇考時俺
荅因愛子來降感 朝廷不殺之恩始受封爵
然虜王之所不能制與陽順陰逆狼子野心者
又何限也比來居安忘危玩視忽戒頗輕邊任
頗薄邊功如閱視之賞稽格不下饋餉之需乏
絕不繼豈所以慎疆圉而衛社稷哉有如虜一
旦狡焉逆我頗行縱有善救者起而撲滅其所

傷豈一二乎孰若明賞罰善廢置謹守成法不
費心力而永絕患虞之為愈也臣寄任匪輕憂
責實大敢不縷縷盡言幸而無他臣言猶為遠
慮不幸有警睫下便生近憂禍福之機寧可料
度有備無患古之格言伏惟採納芻言見之施

行幸甚

三月初
九日上

再催遼帥及言罷斥多官揭帖

題臣惟 國家大事莫甚于邊防而我 朝建

都與虜為隣朝發夕至尤為喫緊 祖宗列聖

經略備具至于 世廟親罹庚戌之變尤極加

意焉遼東近罹倭虜之擾者十餘年殘破疲累

危到七八分處今日再不整理必有不忍言者

總兵馮林既蒙革任內外無論謂非李成梁不

可 皇上往年特用李如松固嘉成梁威名尚

在而謂其子必能制虜也今若即使成梁老手

展布視子更精必當不負任使矣麻貴亦一老將威名不減但係西人必用西兵為家丁馬林因用西丁攪擾遼人家為之厭苦麻貴若不帶家丁則無手足若帶家丁又蹈前轍不若成梁即用遼丁為簡便也二人之外豈無他人皆止因人成事僥倖成功者耳成梁雖老久無宦情而其精力矍鑠尚稱謀勇廷臣推舉不敢孟浪惟冀 允可至于宣大總督宣府巡撫臣前揭已盡實宜早點又有薊遼總督延綏巡撫二

推亦宜早點邊寄之重萬倍常員因循既久不
惟我軍懈怠抑使夷虜生心剝膚之憂所宜惴
慄望勿以等閒例視也臣又惟帝王圖謀大事
必講求長便講求長便必博採群言博採群言
必舍己從人若一人斷制必有未盡小事有錯
猶可改圖大事有錯悔之無及九邊之計豈但
軍民生死所關抑亦社稷安危所係要使衆人
各吐所懷百司共効其力頃見 嚴旨罷斥多
官臣不能無疑焉臣今進言 皇上必謂臣為

救多官耳夫多官固亦宜救而得失尚小若邊
計軍情得失甚大願 皇上于此虚心觀理霽
威反汗實宗社無疆之福即不能盡釋于胸亦
宜稍加分別兵科其職掌也事有不可得而辭
者即言不當尚宜審之容之況其言或有時當
者耶職方郎中舉用大帥匪可草草倉卒為也
其員外郎二員管督捕編軍主事六員除管山
海關外其五員分管清軍驗軍九門存恤若推
補將官係郎中專職同僚素不參預一槩降調

此亦 睿思之所偶遺也夫恩施于不當施之
處則褻威施于不當施之處則濫褻恩濫威而
欲求治猶反冬于夏而易秋于春臣民無所托
命矣昔賢有云天下事非一家私議願平氣以
聽之臣今亦願 皇上平氣虚心講求長便採
臣芻言臣此心不欺可對天地惟 皇上照臨

三月十
三日上

乞假揭帖

題臣于前晚出閣到寓為涼風所襲吐瀉無作
因而滿身如焚百節盡痛呻吟苦楚本期調理
稍痊入直今雖三日未見有效臣心萬分不安
伏乞垂憫准容給假調理謹題請旨

三月二十二
七日上二十

十八
日奉

聖旨卿偶疾准暫調理閣務繁重稍可即出輔政
吏部知道

辭府江恩命䟽

奏為驚聞殊命分難覲承懇乞 聖慈俯容辭
免事項臣偶疾請告調理該吏部接出 勅諭
勅吏部府江叛徭蕩平大獲全捷內閣輔臣運
機調鼎勞績可嘉茲特加恩示酬元輔志臯加
無太子太師還賞銀八十兩綵段三表裏次輔
一貫加無太子太傅還賞銀七十兩綵段二表
裏各廕一子入監讀書餘官如故都照新銜給
與應得誥命如勅奉行欽此移咨到臣不勝愧

汗不勝感泣顧揆愚分深切兢惶隨該文書官
金忠恭捧銀幣到臣私寓臣不敢固辭扶掖望
闕叩頭恭領容臣另行報名廷謝外惟是陞廕
萬分難居輒敢畢其區區之愚臣惟朝廷之所
以御世者惟賞罰賞罰當則人效其官而莫敢
逃其責人盡其力而莫敢愛其身故賞罰非可
以意輕重惟功罪是視也府江之捷介冑士之
勞也臣居內閣獨持文墨議論耳即有題奏之
經承大都皆職掌中常事非能運籌授畫如古

發蹤指示者比也武夫力而獲諸原文臣坐而
分其賞人當謂何 恩命出于 聖心意常從
厚而閣臣不預邊賞臣等屢言不可復濫也明
甚臣聞施惠于人者當令其可受古者愛弊袴
以待有功雖在金幣未可輕與顧 皇上體貌
輔臣時加橫賜而臣既忝其官敢辭其賜抑情
而受猶有可言若加官廕子非常恩數疆臣之
蹠血履腸者上賞不能過此而臣何人也敢冒
領乎聽臣之言行臣之意所以榮臣厚臣者甚

多臣之所得侈矣臣願 皇上推優厚輔臣之心徧及勞臣毋使人有缺望之嗟不均之歎又願 皇上推賞人從厚之心罰人從薄使皆游于光天化日之內以無傷其樂生之心則臣立下風竊得分光借輝逃咎塞責臣之幸也 皇上之賜也伏望俯鑒臣言非虛收回成命將陞官廕子誥命等恩准臣辭免臣無任懇切感激之至

三月初二日奉
四月初二日奉

聖旨府江大獲全捷朕心嘉悅卿為輔臣朝夕協

贊殫忠運籌加恩酬勞實為舊典宜遵成命不允
所辭該部知道

謝問疾賜物疏

奏為恭謝天恩事臣因患病乞假調理伏蒙
聖恩遣御前答應牌子張瓚齎賜臣鮮猪一口
鮮羊一羴白米二石酒十瓶甜醬瓜茄一罈到
臣私寓臣謹就卧榻叩頭祇領訖伏念臣拙于
養生每處危而僥倖果與病會至伏枕而呻吟
塵君父惟疾之憂拜御厨大烹之賜如枯茲逢
春風以披拂似涸鮒獲江海而浸濡應知帝曜
之所照臨定見凶躔必為退匿肉骨有望鏤心

無涯

三月二十九日
四月初二日奉
上

聖旨覽卿奏謝朕知道了禮部知道

再辭府江恩命疏

奏為殊錫難承小量已溢再懇 天恩准容辭
免以分明義以倖生全事項蒙 皇上敘錄府
江功次推恩及臣晉兼宮傳廕子給誥內揣非
分具疏控辭奉 聖旨府江大獲全捷朕心嘉
悅卿為輔臣朝夕協贊殫忠運籌加恩酬勞實
為舊典宜遵成命不允所辭該部知道欽此臣
竊思人臣所畢世而奇遇者人主之隆恩所鞠
躬而恪遵者人主之成命臣獨何心而敢固為

煩瀆之辭哉自量審矣維此府江之捷蓋緣惡
徭作梗郡邑受殃鎮臣運籌武夫効力蒐獵芟
刈以靖黎民其功固偉而比之禦虜禦倭征誅
不軌者亦為有間故總督之酬止于量陞一階
及銀幣之賞耳將帥以下尤其斤斤至于該部
科道一無擬及矣夫行賞止于如此而臣則居
中受成者未嘗費一札之書借一籌之箸也乃
至反膺異數超彼督臣勞未嘗居衆人中而賞
乃出于其上豈不妨公是失人心內何以質方

寸外何以對百僚寧非寡廉鮮耻而犯在得之
戒哉恭繹制詞過稱臣朝夕協贊者豈以臣有
奔走微勞假此以示慈惠乎則臣滋不敢當臣
在閣八年三蒙陞廕一以考績兩以邊功邊功
既是濫叨考績亦為溢賞撫躬省分常懷撲滿
之憂循名責成更深覆餗之懼自舊年秋冬積
苦勞瘵屏居三月始獲生全而入直以來連綿
猶故曾無一日稍獲安舒自忖福分有限天命
難知獨惟茹苦絕甘竇慈與儉或可將此償彼

稍延視息且以多病之軀當多事之日効無一二罪有萬千長思退閒舉賢自代而可躡進無已不知止足哉此所謂害生于恩寵翻為辱者疾顛速戾愈不能少待矣謹用百叩懇辭伏願俯亮臣言悉出秉素收回成命以遂禱祈則寵臣厚臣者大而感激鴻私益比于天海矣

二十九年

四月初三日
上初六日奉

聖旨朕以府江叛徭蕩平文武將士俱已敘功陞賞卿為輔臣朝夕贊襄勲勞茂著加恩示酬寔遵

彞典宜遵成命不必固辭該部知道

乞歸疏

奏為積病轉增負恩深重懇乞 聖慈放歸田

里以延殘喘事臣前以吐瀉兼作具奏乞假奉

聖旨卿偶疾准暫調理閣務繁重稍可即出輔

政吏部知道欽此隨蒙府江論功賜臣銀幣臣

已冒領錫臣陞廕臣已懇辭 皇上優眷近臣

垂鑒微悃甚深極厚臣私惟終始相成之誼死

生戀闕之誠溝壑未填捐糜斯稱而不意命與

厄會疾又大作蓋臣稟賦原弱憂勞又過舊年

秋冬淹纏三月而始入直入直之後旋病旋强
至于新春謝假僵暈闕下移時方甦此萬目之
所共憐也無何以殿試大事係臣職掌竭一生
之力而手口拮据僅以訖事然以積痼積劇夙
疾轉加醫家診視皆云病在骨髓感觸而見實
非旦夕可愈臣展轉牀簀若癡若狂一聞斯言
淚交頤頷臣本草芥豎儒受知聖主荐陟穹
階至膺獨任皇上之遇臣太深矣然天下之
責臣亦重矣皇上所欲為者臣不能片言將

順天下所欲 皇上為者臣又不能積誠感通
是臣么膺微身上虛 皇上之知而下業天下
之罪也 皇上如天如地猶能容臣而天下多
心多口孰能恕臣臣豈能犯天下之所不容而
獨容於 皇上之側乎醫進死徵之言卜有游
魂之兆臣猶遲回瞻戀謂螻蟻或將動天膏肓
庶幾起日而不虞一旦委頓至此臣如不起負
皇上矣負天下矣惟此一息尚在就 皇上乞
身而歸無論臣萬苦中首丘之念可憐 皇上

明與天下矜臣之餘生而天下亦及今明釋臣
之重責臣即死固萬勝於生也夫昔之忠臣有
浮以鴟革諫以牖屍終不忍生前言去者臣非
不知此義緣臣股肱之分既不當以口舌為盡
職而昏憤之中尤不能以心思期再計抑而行
之必發狂疾惟 皇上憫臣特放回籍儻藉藥
餌幸獲生全是 皇上之再造天地不足喻仁
臣矢有啣結而已

四月初
五日上

三辭府江恩命疏

奏為懇祈乾斷必容辭免誤恩以安微分以示
隆知事項者 聖慈因府江之捷加臣以陞廕
誥命等恩臣具疏再辭奉 聖旨朕以府江叛
徭蕩平文武將士俱已敘功陞賞卿為輔臣朝
夕贊襄勲勞茂著加恩示酬實遵彝典宜遵成
命不必固辭該部知道欽此臣惟昔人辭恩有
禮當辭讓而為恭者若臣今日非此之謂也是
恩也在 聖主可以施在臣不可以受臣之前

疏既已詳矣大約事在一隅役非再舉疆臣畢力臣微寸勞臣又仰體愛惜名器之心一循該部具題斤斤擬賞故總督戴耀止陞一階總兵童元鎮尚需吏議自餘更微略無優多也臣於諸臣尚爾而乃身受異恩豈非蔽身不恕而何以示公道乎臣夙稟庭訓頗知止足常憂薄福消受為艱今官已極矣恩太深矣手不執戈肩不荷戈而徒以筆札小技博金紫殊榮于臣涯素千踰萬侈夫捧盤水而加盈之必有傾溢之

患乘駿馬而馳驟之必有顛蹶之虞臣得無是
念乎昔晏嬰不受抑殿謂之幅利其既也又納
邑與政而免于難始乎不受終乎不處乃始成
一晏嬰臣竊慕之而又竊愧之晏嬰在齊能以
君顯納約進規為後人法至今讀徵招角招之
言而想見齊庭盛事然猶自處恒儉若此也臣
行能淺劣無一足稱而位過前賢未知稅駕積
憂成疾既瀕危殆尚可以冒誤恩乎 皇上厚
臣以恩不若信臣以心寵臣以多不若貽臣以

安臣氣息不屬艱于舉筆如復未允又當搜索
枯腸瀆聒天聽伏望俯加原亮聽臣辭免庶

聖朝無虛濫之典而臣亦安分誼之常矣臣無

任馳情懸睇之至

四月初七日
上十三日奉

聖旨朕以府江大獲全捷敘功陞賞卿為輔臣朝
夕調燮茂著勲勞加恩示酬宜遵成命慎勿遜辭
該部知道

乞慮囚揭帖

題臣惟舊年秋冬至今久旱不雨連日又有怪
風昏霾民間二麥無望草木不芽衆口嗷嗷流
移滿路蕪之疫氣時行極可危慮仰惟 皇上
側身修德密禱明祈無所不至而上天猶未昭
格臣在床簀不能頃刻怠遑思所以少裨 聖
籌無由也臣惟天子者天地山川百神之主也
今之天地山川百神亦待 皇上之仁而始發
其仁耳成湯以六事自責而大雨立應 皇上

亦嘗以步禱郊壇而時和歲豐此古今所交誦也臣願垂惻民隱發政施仁使實心著見德意下流宸衷所注群臣自然奉行而霑被不患不遍真今日萬姓虔仰之意也臣又聞孝婦含冤三年不雨刑獄之濫能干天和今熟審雖近只循行故事發放一二輕囚以塞責耳未為曠然一至仁也臣願特發大慈悲心于熟審前命三法司將見監刑部及鎮撫司犯人統加會審從寬奏請釋放如有情法俱重難以寬假者

亦乞量罪遣發免其久繫以散鬱蒸之氣以暢
愁怨之心則萬口歡呼遠近傳頌實感和召祥
一大事也易曰雷雨作解君子以赦過宥罪欲
祈天地雷雨之解先為政刑赦宥之解著之聖
經恪可遵信臣偶有一得輒力疾草奏惟 皇
上省覽採擇

四月十二日上

乞歸揭帖

題臣頃以百病攪心萬愁攻體內外傷感一時
並作於本月初五日具疏乞恩准放回籍拱聽
旬日至今未蒙批發徬徨躑躅時刻難居萬幾
至繁不暇省察愚誠耿耿終當自言竊欲再具
疏陳而心緒憤亂無分毫接續之氣不擇妄發
又恐觸冒威嚴今只得仍寫前疏補進御前伏
乞少留睿思特加哀憫准臣回籍調理倘未遽
填溝壑猶當勉竭狗馬咏歌太平若遂棄捐誓

將結草以報高厚之萬一臣不勝涕泣祈求之

至
四月十三日上

言楚亂揭帖

題臣伏病在家連日訪問外情知楚事更多不敢不奏武昌之亂因陳奉既叅馮應京去任即大出告示數其過惡誣張得意小民家家痛哭雖老稚亦追送馮應京如其父母因而互相殺傷以激此變陳奉見勢來危急躲入楚府若非楚府則奉為粉齏久矣巡按在常德地方未回巡撫在省城小民恨巡撫曲護陳奉隨車痛罵放火燒其衙門昨巡撫疏中但言失火諱之也

觀其引罪深切可見矣今小民群聚圍繞實未嘗散就使輶散安知後之不復聚而相擊殺乎不獨省城即通省大小軍民無不怨彼故道途皆梗消息不通衆怒水火不可嚮邇矣蓋武昌之民前年已作一亂冀奉猶有改圖今彼日甚一日決然不與俱生臣固慮奉必遭毒手奉不足惜如國體何為今之計宜早發一諭數奉過惡而罪之另選一老成忠慎者往以安楚民以尊國體不宜待百姓之殺奉而後圖之也

楚民素悍勇好亂陳友諒子孫極多今改姓柯
在承天興國州地方滿山谿皆是從來不服王
化有司不敢制憂其叵測兼以蠻夷雜居之處
易動難安若亂而後收拾為力萬倍宜萬萬加
意臣在床蓐千回萬轉頃刻難處輒草此揭以
請若但責奉改圖恐其禍本未拔釀亂未已耳
伏祈萬萬留意幸甚幸甚

四月十五日上

四辭府江恩命疏

奏為誤恩非典萬不敢當四懇俯亮微誠收回
成命以免屢瀆 至尊事頃以府江之捷加恩
及臣臣已三辭備輸誠款奉 聖旨朕以府江
大獲全捷敘功陞賞卿為輔臣朝夕調燮茂著
勲勞加恩示酬宜遵成命慎勿遜辭該部知道
欽此控辭愈力天語愈溫徒令臣感激隆知伏
枕號泣藉使可受則既叨顯榮又免陳瀆於臣
豈不甚利甚便而顧有不可覲顏者非為例當

有辭讓故事也亦非但為閣臣不與邊賞一節也蓋是役也一方之事數月之勞督臣奉將天威指顧而定故臣之擬是賞也雖本之部議無所異同亦謂計功議酬略亦相當是以謹守常格無踰越也夫既以常格律人即當以常格自律既以無踰越處人即當以無踰越自處安有施之人者一格而受之已者又一格是將托之于何典乎又非徒如此也凡當事者宜受上賞助旁者宜受中賞今以臣之在旁而賞乃出于

當事者之上本末不相稱倒置莫甚又豈可令人見乎若曰督臣之賞不薄則臣宜薄于督臣若曰督臣之賞尚薄則臣宜無賞以謝督臣又不獨如此也凡功大者敘及本兵敘及主計而臣今未擬及也敘及議科敘及勘道而臣今未擬及也所以不及者亦非忘之為功小而可略也既曰功小而可略何特于臣而異等豈于彼可略而于此不可略乎然則臣不但無以謝督臣亦無以謝廷臣猥濫名器紊淆典常立朝泣

官何以施顏題書荅問何以置辭上以非倫之制詞誣逝者何以告先下以非分之廕敘誤後人何以貽穀執法得而褫奪行道得而吐唾有臣如此安所用之夫王者以榮祿砥礪人而未嘗不鄙饕餮之士人情誰不厭貧賤豔富貴而烏可希壟斷賤夫之所為臣三䟽中已悉此意小醜備物危亡之符力不回天有此控擾若不獲命其能無再瀆哉伏願 皇上鑒臣之情纖毫無假亟准辭免俾安分誼若隆恩厚德則銘

之心膺有叩結不足語報者矣臣不勝徬徨迫
切叩首叩首之至

四月十八日上
二十一日奉

聖旨朕以府江獲捷卿居政本贊襄加恩示酬實
遵彝典卿乃屢辭情詞懇切具見忠慎謙美誠可
嘉尚陞官特准辭免廕子宜勉祇承方今國家多
事卿宜慎攝稍可即出輔政以副眷倚至意該部
知道

言大典揭帖

題臣嘗揭請舉行大典而考我朝 聖祖神宗
皆因時起事以至于後昆蕃衍福祚靈長言皆
有徵意期啟沃不覺疊疊滿篇不知曾 賜覽
觀否無論在廷之煩瀆可厭即臣亦自厭其煩
瀆而終不能無言焉蓋此舉自 國家盛典至
今日又國家曠典顧為理勢之所必然古今之
所同然如日用飲食不可缺之事乃常典耳何
得視之太重持之太堅而至于行之太緩乎生

子而願其長長而願為之冠為之婚又願其及
早成立育男舉女啟後光前自遠古以至來今
自天子以至庶人誰不同此心同此事臣故曰
此常典不足以煩 聖心之遲回也 祖宗累
朝繼繼繩繩以及我 皇上 皇上二十齡而
誕育 皇長子以及諸皇子今 皇長子已屆
皇上誕育之年而典禮尚遲則誕育亦且遂遲
皇長子遲則諸皇子亦且以次遲然則 皇上
齊天之福固不減于 太祖而 太祖有一百

二十一孫 皇上尚未有一孫更待何年而遂
此多孫之願乎青宮正位玉樹盈前環幄遶堦
逶迤起為壽一派分支共扶國祚于萬世 皇衷
有不悅豫而 聖體有不安康乎士庶之賤有
三十歲而見孫者至尊今日尚缺此事臣固以
為晚也臣比纂修玉牒恭計天潢之多至有一
十五六萬位矣此皆從 太祖一身之所衍生
者 皇上體厚氣完福隆慶備亦可期子孫有
如此多當從今日早為之計 皇上寧無意乎

臣又思太祖既有一百二十一孫而又享極高之壽此可見冊立冠婚無妨于聖躬而適足以致永年多福之驗也太祖以無疆景祚開創于前皇上以無疆景祚紹述于後仁覆天下萬福自集聖德益大聖壽益高太祖未嘗疑子孫之多以為妨礙比類而推理亦彰彰著明矣蓋唐虞之朝稱無稽之言勿聽弗詢之謀勿庸凡假借禍福之言牽合徵應之語非存之典籍載之詩書者宜無聽納于耳芥蒂于心孔

子曰大德者必得其位必得其祿必得其名必
得其壽詩曰嘉樂君子顯顯令德宜民宜人受
祿于天保佑命之自天申之易曰積善之家必
有餘慶書曰惠迪吉從逆凶惟影響夫曰令德
曰積善曰惠迪修此道者諸福必從此理自然
萬無一爽舍此之外皆所謂無稽勿詢而帝王
之所逆棄者何足以縈牽心胸而擔誤天下之
大事也 皇上幸乘此諸臣拱聽之時獨奮英
斷成大信于天下 諭禮部將三大典禮擇日

並行天下幸甚宗社幸甚

四月二十日上
二十日奉

聖旨朕覽卿奏懇切詳明具見忠愛敬慎已知道
了但大典所用器具成造未備且昨覽文書見禮
部與多官又共上本章瀆阻故爾疑遲所奏已知
道了

五辭府江恩命及乞罷歸疏

奏為輔理無功有罪世賞冒濫非宜乞恩准容
辭免仍乞罷放歸田以重政本事頃臣因病兩
疏求歸未蒙批發府江敘功加臣以晉官廕子
給誥等恩臣四疏懇辭奉 聖旨朕以府江獲
捷卿居政本贊襄加恩示酬實遵彝典卿乃屢
辭情詞懇切具見忠慎謙美誠可嘉尚陞官特
准辭免廕子宜勉祇承方今國家多事卿宜慎
攝稍可即出輔政以副眷倚至意該部知道欽

此夫臣之事主豈敢飾虛固辭大恩亦以誠難
自欺而正不可改故也臣在閣七年獨任者三
年矣去冬一病幾不復生今春以來顛踣者屢
而不諒者尚曰未然人固有勞瘁愁苦不得志
如臣而不病者乎金石將銷而况血肉之軀耶
可以喻矣今臣未敢論病但論不職則臣之當
黜不當賞明甚前疏所陳亦姑與督臣廷臣較
而言其不可耳非原本之論也請復陳之人之
責臣者皆曰天下無不可為之事明主具可為

堯舜之資而不為堯舜則輔弼大臣之辜也既不能矣亟宜奉身而退以付能者天下寧無在乎臣深以其言為然生平伎倆竭于此矣虛擲歲月于今極矣尚復遷延更何所待今日已誤可再誤乎此臣之所以悚息悲啼而不覺病之危殆也引罪求去萬不得已皇上不孜孜政事而獨拳拳以府江之恩私臣人以為上之所厚輔臣者如此寧不聽其一言乎輔臣能多取于上如此謂不能得請于上乎典禮之未舉

也閣臣之未補也多官之虛席也考選之久稽也礦稅之橫索也刑獄之滋濫也宣索之過侈也放逐之莫還也有一于此足以罪臣而况無此以責臣臣何所持以謝天下含垢忍辱而無耻今古惟臣一人耳不能為國家畫一奇無分毫功德報朝廷酬天下而身都大位不去既已罪矣又復竊人之功冒人之賞且倍蓰焉尚有入心乎昔齊桓公出行見老人而賜之衣辭曰願賜一國之寒者賜之食辭曰願賜一國之饑

者今天下之為饑寒者多矣而臣不能以老人
之說效臣之罪可擢髮雖應賞亦當辭又況不
應賞乎臣既不能以正輔導而今日之賞安敢
不以正辭 皇上第中心無為以守至正復萬
曆初年治平之觀則君臣偕榮河潤無限必不
令臣之子孫不立門戶矣敘廕誠非臣願不敢
以汚明命玷國章懇乞 聖明察臣危衷味臣
苦言容臣辭免廕恩仍放回籍以為奉職無狀
之戒別選賢才以資弘贊之功天下未嘗無賢

才也惟選擇而任用之必有旋乾轉坤之策若臣伎倆已盡空留無為也臣不勝哀懇之至

四月

二十二日上
二十三日奉

聖旨府江大獲全捷卿運謀贊襄加恩示酬實為舊典乃屢疏陳乞情詞懇切廕恩特允辭免成卿勞謙之美方今國事多艱卿宜慎加調攝稍可即出輔政以副慰朕至望所辭不允吏部知道

回諭札言楚變處置揭帖

題該文書官盧受傳出

聖諭諭內閣朕以開礦稅課原為裕國愛民權宜
之計何乃內外官員不能仰體協恭任事殊負
委任德意近湖廣激變軍民鼓譟異常該撫按
官奏來昨東廠具奏傳聞奉差校番有被變民
細縛投江而死者又有羈留不能回報者覽其
各奏連日焦思雖係內官陳奉濫用匪人徵多
鮮少致啟釁端其該地方諸文武官受朝廷爵

祿誦孔子教言既不能遵旨調停和衷於平日
又不行忠君執義撫戢於臨時職守何在法紀
奚存各處若皆群起效尤縱惡長奸辱國損威
莫此為甚陳奉已有旨回京治罪而鼓譟之相
戕其中喧聚猖亂必有指使首惡之徒卿等為
朕輔弼股肱義同休戚作何安撫禁戢並查處
該地方經管官員及正法首惡脇從姑免追治
詳擬奏來特此諭知欽此臣捧誦欣嘉仰見
聖心加意楚事講求安撫禁戢仁義並施之術

臣聽聞滿耳前揭略具日訪夜思頗得機要臣
思李道本處分發去彼處亂釁可解五六分矣
楚中喜見天日必歡然呼萬歲矣此只是前一
着耳楚中還看朝廷後着如何百姓不堪陳奉
之虐及叅隨人等剝民奪民淫民妻女不勝憤
恨群然並起勢不俱生忿之所激不顧生死今
聞明旨取回陳奉治罪則百姓憤心漸平但
恐自知有干憲典懼心未釋或尚屯聚未即解
散耳臣之愚慮以為當先安人心而後以解散

繼之先散黨與而後以正法繼之總當先遣才
望大臣往代巡撫之任密授方略按先後着數
而行蓋楚人怨撫臣支可大極矣變之初起有
坐其門呼名而罵者撫院之火亦百姓所為因
按臣出巡在外撫臣一味詭隨全不禁約叅隨
之橫故百姓恨陳奉而因及撫臣撫臣被百姓
輕侮至此則臨事不足仗倚可知百姓於撫臣
尚且罵詈焚燒則於各地方官不復顧畏可知
臣記得萬曆初年浙江兵民兩變毆打巡撫吳

善言 旨意但歸罪於啟釁之人而以德意撫

戢其軍民遣侍郎張佳胤為巡撫密授以意佳胤於是宣布德意撫安地方從容訪其渠魁一舉擒之奏報朝廷榜示天下不激不徐甚為得法今日楚事當畧倣此意而圖之蓋楚中治亂安危在此一舉得法則收拾甚易可止如浙江之變不得法則收拾甚難恐遂為寧夏之續矣聖諭所謂首惡正法脅從姑免追治甚得定亂之法但倉卒之際尚未知誰為首惡誰為脅從

不但事有枉縱而恐百姓一聞拏治之意誰不自驚自疑彼首惡者反得挾衆人譙疑之意以自固又或至于逃江匿湖煽動蠻夷為患不小故臣請且慰安解散而以安撫禁戢二事並授意于新巡撫行之陳奉罪惡深重宜明示重處以洩衆憤巡撫支可大先事不能規正遇變不能彈壓當勒令回籍閑住而遣一大臣星馳代之許以便宜從事到彼宣布恩威分散黨與然後從容密訪致變之人與鼓譟之人務在的實

設法擒拏為首者即以正法其餘姑免深究冒
濫匪人剝民奪民淫人妻女激變百姓者亦各
以其罪罪之本省官員不職者聽科道糾劾吏
部分別處治大小缺官亟與除補仍徧諭天下
撫按司道各以楚事為戒國事民生務要調停
區處傳當礦稅中官以陳奉為戒虛心公平與
外臣共加調停毋得偏執已見大小一心中外
共濟則不但三楚之事可定而天下之民舉安
矣臣卧病私寓心神憤亂倉皇上陳其餘未盡

前
三
十
日
上

事宜容臣細加審處謹具上聞

四月二十三日
上

又言楚事遣官揭帖

題竊見古人遇有難處之事必先擇一了事之人假以便宜則事功不勞而成湖廣軍民鼓譟一事臣引先年遣張佳胤之例以對 聖問因思群臣可以堪此任者亦少若外面遷轉則恐到任稽遲且朝廷密意無由指授在廷之臣未經事變者又未知其能辦此否若官階已崇及曾經用兵者又恐百姓驟聞或生驚疑而成他變臣反覆思維又與部院商確惟用工部左侍

卽趙可懷最爲妥當本官曾任陝西應天兩處
巡撫遇事善處迎刃立解不激不緩動中機宜
若令本官照張佳胤故事往代支可大巡撫湖
廣地方朝廷授以方略令彼便宜從事限五日
以裡起身前去臣知其到彼必能宣布恩威解
散亂民訪察不職文武官員殲除首惡放釋脅
從不致枉縱不須焦勞而事可盡辦也往時張
佳胤原是特旨欽遣不由部推故臣與部院議
定始敢密以聞早遣一日則有一日之效惟復

仍命廷臣會推候旨點用伏乞 聖裁其湖廣
司道府縣等官有缺而未補者臣已密語部臣
速推相應人員星馳赴任并乞 聖明密賜點
用臣謹擬諭帖一道惟裁擇施行

催點各司道官揭帖

題頃接新簡巡撫湖廣侍郎趙可懷揭帖內言
請補地方司道官員等情臣惟布按二司官員
下以統領郡縣之事俾之可達于上上以宣布
撫按官之意俾之必行于下故比之綱紀樞轄
不可一日缺者也今趙可懷奉命出撫首以此
官為請可見撫臣恃此如左右手之急矣以此
推之天下之望司道者其情豈異哉臣思二十
六日吏部題補司道官一本蒙 皇上已點三

十三員發臣票上而尚未允發臣惶惶恭俟以
日為年伏乞即賜檢下庶令海內皆知宵旰憂
勤德意而所以消釁孽保治功者不小矣臣不
任懇求之至

四月二十八日上

票鄭國泰本附揭帖

題今日文書官盧受傳出

聖諭諭內閣朕今日覽文書見都指揮鄭國泰一本甚是狂肆可惡且大典之旨不啻再三何乃違旨又來奏擾且春初內外及諸司靜俟朕即擇日命其移居矣而隨着各該衙門上緊查例題造所用之物有何疑議况器物皆金銀珠玉即士庶富族尚且常用何乃帝王之家而不用乎諭卿等知恭捧到臣臣再三叩頭欽誦適又

發鄭國泰本令臣擬票臣看詳此本具見國泰
小心敬畏之意戚畹如此可謂賢矣正宜嘉獎
以成其美似不當與尋常奏擾者一槩而視也
蓋國泰之意一則欲闡揚皇貴妃之賢名使無
訛言一則欲保全已家之福祚使無後患一則
欲解其母夫人之憂慮使之康寧壽考故違
旨奏擾有所不顧器具未備有所不知而不覺
其言之剴切實與諸司無故而狂肆者不同也
臣惟此禮天下望之甚久疏中所言伏闕跪請

廷臣實有此意但顯侯德音未敢輕舉耳至
云太子不立天下震動及萬古綱常所係
宗社安危所關等語尤為剖肝瀝膽忠愛之言
皇上宜俯加採擇臣謹再擬傳諭一道上進伏
乞聖斷施行

五月初七日上

言首輔病催補閣員揭帖

題臣惟首輔久病沉綿不省人事萬無再起之
理滿朝不咎首輔之不去而咎臣之不上聞
今日其子鳳翀又来朝房見臣涕泗祈請代揭
伏望 皇上早許致仕以全優禮輔弼終始之
意臣又惟內閣四人獨臣猶在而支離百病負
荷無堪恒以 聖恩深厚不得不勉強支持迷
忘既多錯亂不少朝夕戰懼罔知攸措惟 皇
上俯垂哀憐早下爰立之命或起舊臣或賜新

簡吏部推舉已多 聖衷籌度已久得人必真
有不待臣之贊一辭者惟在早斷庶幾國事多
賢之利而臣亦免覆餗之誅臣不任哀懇之至

五月初
十日上

擬救荒諭揭帖

題臣訪得畿輔八府及山東山西遼河南荒旱
極矣斗米銀二錢小米斗銀一錢菜蔬之類倍
價無買四鄉樹木剝皮至頂野無青草載道流
離盜賊群行正晝搶劫雲漢轉高炎蒸轉劇

皇上日事祈禱而百神莫應意者實政未布而
天意未回歟臣惟災沴之行在于時而救禳之
術存乎政如有善政則天時不能使之害盜賊
不能為之災雖有九年之水七年之旱而民無

離心治平之效不損也今南方猶熱而有楚憂
北上甚饑豈無意外安危之計懸于君父一
心但發明旨數行便可拯民命于既死銷禍
變于燃眉伏冀仁慈俯垂採納臣擬諭旨一
道乞賜裁定發行生靈幸甚社稷幸甚

催補科道揭帖

題臣惟行取諸臣到京已歷三年選後又經一年引領補官未蒙 俞發庶吉士題授科道官者七員亦經十月矣未蒙 俞發諸臣皆歷試中外以賢良著聞者委任責成必有可觀而既離舊官未拜 新命即同閑住又似羈縻甚為明時惜之今科臣止有六員南科止有一員御史處處缺差需人交代者不可勝數既經考選理當除授諸臣無可棄之罪而棄之則失人臺

省非可虛之員而虛之則失官稱職與否試用
自見用之稱不稱而進退之惟 皇上命耳伏
望 皇上檢發部院考選行取原疏及吏部題
覆臣等散館原疏 俯賜允用

五月十五日
上

言李願當陞揭帖

題昨吏部會臣于朝房言薊遼總督蒙皇上親擢萬世德才地甚宜不勝欽服各官廷推原曾擬及但為總督節制巡撫而順天巡撫李願已為右都御史二品官今萬世德以三品侍郎節制之有妨行事所以中止李願歷二品俸已深屢推別用若得允陞則二官之心彼此皆安臣以其言為然今本部催請南京右都御史之命如蒙點用李願遺下員缺以年淺僉都往李

願離任而萬世德可展布矣又講官劉元震滿
考待命進退維谷臣前揭中請以南京禮部尚
書處之俾其善去以明 皇上重學崇儒之意
今吏部催題望加賜點豈惟元震之幸臣可以
別擬講官以輸啟沃之忠也

五月二十
五日上

救何棟如揭帖

題楚民激變勢同滔天蒙 皇上渙發天心收

陳奉回京治罪而彼處亂民漸以寧帖 聖心

之至仁甫動而天下之轉旋甚神其機如此計

算趙可懷此時入境必有次第臣日夜懸望尚

無的音即楚人之來者亦少今襄陽百姓來保

救推官何棟如棟如已將拏到夫襄陽之民不

敢效尤抗違而來哀控闕下恭順之心良可嘉

獎正當乘此善機縻係固結使武昌之民有所

感發則輯寧之事不勞而可奏矣今何棟如拿
到臣竊窺 聖德深厚必加在宥之恩輒敢以
一言將順焉蓋楚民雖有寧帖之機尚在將寧
未寧之際趙可懷雖有安民之策非奉 皇上
德意亦束手而無策故何棟如之拿楚民方以
此探 皇上之心也如蒙 皇上輕處則所奉
撫輯軍民俾奉安生樂業之旨真 皇上之心
也楚民可以無懼矣若 皇上猶不忘怒則猶
信陳奉之言而撫輯之旨悉虛也其懼心何時

而釋禍亂何時而解乎如此而欲責趙可懷弭
之不能矣 皇上不難以數字處陳奉而遏其
滔天之勢何難以數字宥何棟如而堅其望治
之心楚地安危機在于此無論棟如有罪與否
縱使有罪亦祈權從末減姑慰衆心况棟如係
陳奉所叅奉既有罪棟如宜無罪矣伏乞 俯
採臣言特賜恩赦以昭 聖心不為讒譖之所
欺以昭 聖心實憐萬民之塗炭使其欣然誦
日月光天之德所謂宥一人而千萬人悅者庶

高
三
幾楚事可全美也臣憂念釁虞寢食俱廢不敢

不竭忠披誠

八月初
三日上

再揭帖

臣惟楚民倡亂是天下觀望之機也今何棟如
拿解到京又楚民觀望之機也機之所在而處
置無差則萬事可不勞而定矣臣前日特為何
棟如之事具揭請命未蒙 允荅臣不勝憂悶
恐錯一機則楚民難安而天下不無效尤也

皇上縱怒此一小臣亦當為天下大計而曲加
容赦况原無督過之意但因陳奉妄奏而致此
無傷於日月之明乎在前諸臣被逮者多矣臣

未嘗有此固請今何棟如一推官耳而臣為之
諄諄禱祈蓋為國家安危大機間不容髮實

有不容已于心者赦一小臣其事甚易而可以

安定天下其效甚大萬望俯加垂採

六月初六日上

催點四川巡按揭帖

題臣惟平播功賞未行將士日夜跂望皆緣勘
功御史無人之故四川巡按崔景榮丁憂離任
已經半年昨都察院題差一本望早賜檢發臣
又惟播功關係三省彼此掣肘若必會同勘奏
益致耽延無期不若使三省御史各勘本省兵
部總覆為便如蒙發票容臣擬議上請六月上

救何棟如馮應京揭帖

題比日楚事之興臣甚服 皇上之斷易陳奉

而下回京治罪之旨遂支可大用趙可懷剋期
催赴使楚民有所恃而不忍為亂有所畏而不
敢為亂真睿謨也今可懷往四十餘日矣再以
疏來而一無 批荅竊恐可懷之心疑而楚民
亦從此疑臣以為今後可懷疏來願不吝數字
慰之至望也臣于初三初六日曾上二揭為拏
到襄陽府推官何棟如乞恩宥赦亦休蒙 荅

竊窺 聖心似已有採納之意顧臣能自信而
民愚安能如臣之信且臣未奉 明旨無詞以
荅可懷而釋愚民疑畏之心此所為日夜跼蹐
而不寧也今僉事馮應京又拏到矣未審 聖
明何以待之馮應京在楚中甚得百姓之心去
任之時老穉填街泣送至今家家設一牌位焚
香供養遠近誦之如出一口此則楚地安危命
脉所關係也處分稍失後悔難追 皇上凡遇
軍國大事如征倭征播南北邊情一一至當無

少差失今楚亂不小 聖籌素定必無待于臣
言但臣憂迫在心有不能已竊謂應京既得楚
民之心則當即用應京以安楚民其事甚便不
然亦當從寬善處赦其罪而別用之又不然亦
宜無麗于刑而早為昭雪必不宜更露譴訶而
引陳奉之過為已過也昔漢武帝時倪寬為三
輔守以負租當罷民間其當罷皆恐失之大家
牛車小家擔負輸租緇屬不絕課功更景武帝
以此愈任用寬使安三輔之民由此觀之小民

之心信可以德感若釋應京而還用于楚楚人
有不感激而今應京之課為天下先者乎儻措
置少失中和而使楚人不能釋其疑則彼所供
養之牌位香火何年何月從何委棄將恐嘯聚
不已而區區一趙可懷必無能以虛言解釋矣
縱忘楚地豈可忘顯陵而輕置之于度外也
乞將馮公併何棟如等一千拏來楚犯大開
湯網以復元仁免其罪而優容之則此一斷也
更出常情之外而理亂定傾莫國脉于永永矣

臣托在腹心實同休戚不敢不極言備陳

六月二十

上
一日

催大審揭帖

題臣惟自古帝王無不致謹于刑獄者蓋上帝
好生不好殺帝王敬奉上帝必仰體好生之心
而務思全活民命雖一草一木一禽一蟻之微
猶不忍也況于人乎 皇上天性至仁尤勤矜
惻故常下停刑之旨用培仁壽之基盛德浹于
人心非一日矣舊制每年一熟審五年一大審
今年正當大審之期已屢奏 明旨而至今尚
未遣官臣查萬曆二十四年于五月間

今已七月矣兩京瞻望有同時雨一日楚楚人
致遺忘而翹首跂足者一日三秋也伏望聖賜
遣官之命使圉圉之人幸見天日則協氣四流
而豐穰可望人心歡慶而嵩祝無疆矣十六月二
十九日
上